



*Bošnjačko nacionalno vijeće u Republici Srbiji
Bosniac National Council in the Republic of Serbia
Национални савет бoшњачке националне мањине*

**REPUBLIKA SRBIJA
MINISTARSTVO DRŽAVNE UPRAVE I LOKALNE SAMOUPRAVE
Branko Ružić, ministar**

*U Novom Pazaru, dana 21.08.2019.godine
RB:674-01/2019*

PREDMET: Odgovor na Vaš dopis broj 90-00-00060/2019-27 od 14. avgusta 2019. godine

Poštovani,

Obavještavam Vas da je Bošnjačko nacionalno vijeće, dana 16. avgusta 2019. godine, primilo Vaš dopis naveden u predmet ovog podneska.

Razmatrajući navode koje ste istakli u predmetnom dopisu, imam obavezu ukazati Vam na nekoliko bitnih činjenica iz kojih se nedvosmisleno može utvrditi neosnovanost Vaših navoda i zahtjeva, ali i Vaša krajnja namjera da, suprotno izbornoj volji Bošnjaka, Bošnjačko nacionalno vijeće stavite u službu velikosrpskih nacionalnih interesa.

U pogledu uočenih pravnih manjkavosti i propusta posebno ističem to da nije naveden konkretan pravni osnov koji Vam daje pravo da odluke organa Vijeća, odnosno opća akta, stavljate van snage. Postupajući na ovaj način prekoračili ste svoja zakonom propisana ovlaštenja.

Vaša tvrdnja da je Odluka o pokretanju Inicijative za rješavanje statusa Bošnjaka i statusa regije Sandžak nedopuštena jer je politički akt koji izlazi iz okvira Ustava, u direktnoj je koliziji sa samim Ustavom. Članom 56. stav 1. Ustava kao jedno od osnovnih ljudskih prava i sloboda predviđeno je pravo na podnošenje prijedloga državnim i drugim organima javne vlasti.

Zakon o nacionalnim savetima nacionalnih manjina ne propisuje obavezu Izvršnom odboru Vijeća da sve svoje odluke i druge akte prosljeđuje Vijeću na odobrenje. Ta vrsta obaveze postoji samo u slučaju kada Vijeće povjeri Izvršnom odboru odlučivanje o pojedinim pitanjima, shodno odredbi iz stava 6. člana 7. Zakona o nacionalnim savetima nacionalnih manjina.

U ovom konkretnom slučaju Izvršni odbor Vijeća postupao je na osnovu prava na samostalno odlučivanje iz člana 10. stav 1. tačka 14. Zakona, člana 14 a stav 1. i člana 42. stav 1. tačka 6. Statuta.

Dakle, član 7. stav 6. Zakona o nacionalnim savetima nacionalnih manjina nije uzet kao pravni osnov za donošenje Odluke o pokretanju Inicijative za rješavanje statusa Bošnjaka i statusa regije Sandžak, te s tim u vezi nije postojala obaveza Izvršnog odbora da ovu Odluku proslijedi Vijeću na potvrđivanje a shodno tome nije moguće ni primjeniti sankciju propisanu u stavu 8. člana 7. Zakona o nacionalnim savetima nacionalnih manjina.

Neosnovano je valjanost ove Odluke, postupak njenog donošenja i njeno dejstvo cijeliti kroz primjenu zakonskih normi koje, u ovom konkretnom slučaju, ne mogu biti mjerodavne jer nisu bile ni osnov za njeno donošenje niti su ispunjeni zakonom propisani uslovi za primjenu sankcija koje su tim normama propisane.

Članom 10. Zakona o nacionalnim savetima nacionalnih manjina propisano je da nacionalno vijeće, u skladu sa zakonom i svojim statutom, preko svojih organa samostalno, vršeći svoja opća ovlaštenja, ima pravo da zauzima stavove, pokreće inicijative, preduzima mjere u vezi sa svim pitanjima koja su neposredno povezana sa položajem, identitetom i pravima nacionalne manjine.

Statut Bošnjačkog nacionalnog vijeća, članom 14 a. stav 1, daje pravo Izvršnom odboru Vijeća da to opće ovlaštenje, može vršiti samostalno. Gotovo identično pravo Izvršnom odboru utvrđeno je i članom 42. stav 1. tačka 6. Statuta Vijeća.

Ustavom Republike Srbije (član 56. stav 2. i stav 3.) propisano je da zbog upućivanja prijedloga državnim organima niko ne može da trpi štetne posljedice kao ni štetne posljedice za stavove iznijete u podnijetom prijedlogu, osim ako je time učinjeno krivično djelo.

Vaš zahtjev za razrješenjem Izvršnog odbora Vijeća apsolutno je suprotan i citiranoj ustavnoj odredbi.

Na osnovu navedenog, ne postoje zakonske prepreke da Odluka o pokretanju Inicijative za rješavanje statusa Bošnjaka i statusa regije Sandžak, kao i Inicijativa rješavanje statusa Bošnjaka i statusa regije Sandžak kao njen sastavni dio, ostanu i dalje na snazi. Takođe ne postoje zakonom propisani razlozi za razrješenje Izvršnog odbora Vijeća.

Koristim priliku da Vas podsjetim da su Bošnjaci narod a ne srpska manjina i da Vas pozovem da bez odlaganja prihvatite tu činjenicu. Bošnjački narod u Sandžaku, slijedeći svoje legalističko opredjeljenje, prihvatio je da pitanje svog statusa, položaja, prava i identiteta rješava kroz postojeće institucije države u kojoj živi.

Bošnjaci su politički narod, a Bošnjačko nacionalno vijeće je najviše političko i predstavničko tijelo Bošnjaka. Vaša obaveza kao ministra je da uvažite ovu činjenicu.

Vaša dužnost je da poštujuete izbornu volju bošnjačkog naroda u Sandžaku. Svaki postupak usmjeren ka gaženju izborne volje smatraćemo aktom otvorenog nasilja i mržnje prema Bošnjacima, kao i pokušaj stavljanja Vijeća u službu velikosrpskih interesa.

Imajući u vidu da ste visoki funkcioner političke stranke koja je direktno odgovorna za neprijateljstvo i zločine nad bošnjačkim narodom u Bosni i Hercegovini i Sandžaku zabrinjava nas Vaša očigledna namjera da pripadnicima bošnjačkog naroda suspendujete pravo da legalnim putem riješe pitanje svog statusa, unaprijede svoj položaj i prava, te očuvaju svoj identitet.

S poštovanjem,

